



Tusagassiorfinnut nalunaarut Pressemeddelelse

Qulequtaq

Pitu Pitu ilalerneqarluarpoq

Peqataasut ilaat qiimmatsassimalluni aallartipallannissamik oqariartuuteqarpoq.
Ullut marluk ataatsimeersuartitserernerup kinguningua taamatut oqariartuuteqartoqarpoq, ilaatigut Digitalimik Sullissinnermut Aqutsisoqarfiup aaqqissuussiffigisaani.

Paarsasseqatigiilluni attaveqaat nutaaq, Pitu, ataatsimeersuarnermi sammineqarpoq, taannalu atorlugu inuiaqatigiit pillugit paasissutissat digitalimik suliarineqartassapput. Pitu atorlugu paasissutissat pissarsiarineqarsinnaalissapput, tassanilu paasissutissanik atorfissaqartitsisut pisinnaatitaaffillit kikkulluunniit pissarsiniarsinnaallutik. Taamatut periarfissaqarneq peqataasumit qiimmaatsaatigineqarpoq.

Pitu atorlugu assersuutigalugu imminut sullitarinissamut aaqqiissutit pitsaanerusut inerisarneqarnissaat ajornaannerulissaaq. Assersuutigalugu innuttaasoq sanaartornissamut akuersissummik qinnuteqarniarpoq. Qinnuteqarniarpoq Sullissivik.gl-imi NemID atorlugu isissaaq taannalu atorlugu iseruni tunngaviusumik paasissutissat soorlu aqqa, najugaa, inuup normua, nunaminertamik atuinissamut akuersissut, aningaaserivimmit akissarsiat pillugit akuersissut il. il. atortorissaarummi angakkuakkatullusooq takuneqarsinnaapput.

Internettimut attaveqarnissaq taamaallaat piumasaqaataaginnarpoq, taamaannikkut innuttaasup pisortanik e-mailikkut, oqarasuaatikkut imaluunniit ornigulluni attaveqarniarnerminut piffissaajassanngilaq. Atortorissaarummi paasissutissat pigineqareerput. Innuttaasut suliffeqarfiillu paasissutissanik assigiinnik pisortanut ataasiaannarlutik tunniussisinnaapput – *once only* tunngavigisaaq atorlugu – paasissutissat taamaalillutik pisortat akimorlugit, tassa pisinnaatitaaffilli akornanni, atoqqinneqarsinnaalerlutik. Innuttaasoq assersuutigalugu nunaminertamik atuinissamut akuerisaasimappat, sanaartornissamut akuersissummik qinnuteqarnerani imminut sullinnermut aaqqiissummi paasissutissaq siumut takuneqarsinnaareerumaarpoq.

Pitu atorluguttaaq paasissutissat sunut tunngasut nalunaarsorsimanersut, kikkunnit atorneqarsinnaanersut aamma sumut atorneqartarnersut innuttaasup takusinnaagai periarfissaqarpoq.

Brevdato: 12-09-2018
Sags nr.
Akt. nr. 3710651

Postboks 1037
3900 Nuuk
Tel. (+299) 34 50 00
Fax (+299) 34 63 50
E-mail: ikin@nanoq.gl
www.naalakkersuisut.gl

Estland aamma Savalimmiut

Estlandimiit Savalimmiuniillu aallartitaqartoqarnissaa Digitalimik Sullissinermut Aqutsisoqarfik aggersaavoq. Estlandip Silarsuaq tamakkerlugu paarlaasseqatigiinnermut attaveqaatini siuarsimanerpaanera aggersaanermut tunngaviuvoq, taavalu Savalimmiuni attaveqaat ukiuni arlalinni Estland ikiorsiullugu suliaqarsimalluni. Estlandimi paarlaasseqatigiinnermut attaveqaatigisaat X-Roadimik taaguuteqartinneqarpoq Savalimmiunilu Heldinimik taaguuteqartinneqarluni. Nunatsinni Pitup qanoq inerisarnissaanut nunat pineqartut misilittagaat isumassarsiorfittut atornerqarluarsinnaapput.

Estlandimiit peqataavoq ilaatigut Danmarkimi Estlandip ambassadøria, Märt Volmer, taassumalu peqatigai immikkut ilisimasallit namminersortuniit aamma pisortaniit. Savalimmiuniit Heldin pillugu programmimut pisortaa inerisarnissaanullu sulisut. Ataatsimeersuarneq soqutigineqarluarpoq, tassanilu pisortaniit namminersortuniillu peqataasut 90-it missaanniipput. Tamatuma saniatigut ataatsimeersuarneq videokkut toqqaannartumik aallakaatinneqarpoq nuna tamakkerlugu agguaqatigiisillugu amerlanerpaamik 18-inut isiginnaaqataasut agguataagaallutik.

Ataatsimeersuarnermi Estlandip X-Roadimik misilittagaat qanoq ingerlanneqarsimanersut taavalu Savalimmiuni Heldin qanoq ingerlanneqarsimanersoq saqqummiisoqartarlunilu oqaloqatigiinneq ingerlanneqartarpoq. Nunanit marluusunit misilittagarineqartut naapertorlugit, innuttaasunik suliffeqarfinnillu pitsaalluinnartumik kiffartuussiniaraanni, nunap angissusaa imaluunniit nunami innuttaasut amerlassusaat apequtaanngilluinnarput. Estlandip digitalimik nutaaliornera Silarsuaq tamakkerlugu maluginngitsoorneqarsimannilaq, 2017-imilu Forbes-Magasiinap Estlandi “Europap digitalikkut siuttuanik” taasimallugu.

Pitu sumut atorsinnaava

Paasissutissat mianerisassat paasissutissanik atuisup pisiortorfiullu akornanni isumannaatsumik paarlaaqatigiissutigineqarsinnaapput, taamaaliorinnaallutillu susassaqqanngitsunit takuneqarsinnaajunnaarlugit imaluunniit sunnerneqarsinnaajunnaarlugit. Paasissutissat tamaasa pissarsiassaalissapput, taavalu paasissutissanik pissarsinissamut pisinnaatitaaffillit kikkulluunniit pisariaqartitsinertik naapertorlugu pissarsisinnaallutik. Tamanna nutaanik periarfissaqartitsilerpoq, matumani inuiaqatigiinni inerisaanissamut, tassami assersuutigalugu suliffeqarfinnik nutaanik pilersitsitsisoqarsinnaagami.

Pitu atorlugu imminut sullinnissamut aaqqiissutit amerlanerusut periarfissaralugit pisortanit ataqatigiinnerusumik paasiumarnerusumillu kiffartuussinissaq innuttaasunit suliffeqarfinnillu misigineqalissaaq. Paasissutissat nutartikkat malinnaasullu tunngavigalugit politikikkut aalajangiisarnermi tunngavigineqarnerulissapput.

Suut pisariaqarpat

Paasissutissat allanut ingerlateqqittarniaraanni, allallu pisariaqartitaat paasiumagaanni, najukkani pisortat namminersortullu akornanni tapersersuinissaat piumassuseqarnerallu pisariaqarpoq. Taamaattumik paasissutissat tunniunneqartartut

qanoq pineqartarnissaat attaveqaqatigiinnermi ersarissuunissaq paasiuminartuunissarlu pingaaruteqarpoq.

Qanoq ingerlariaqqissaagut

John Siegstad, Digitalimik Sullissinnermut Aqutsisoqarfimmi pisortaasoq ataatsimeersuarnermi naggasiivoq oqarlunilu:

”Maanna ataatsimeersuarneq iluatsilluartoq peqataasuniit soqutigineqarluartoq, oqalliffiulluartoq apeqquteqarfiulluarterlu naammassivarput. Estlandimiit Savalimmiuniillu misilittakkat tusarnaareerpavut, taavalu ajunngisaaqalutik misilittakkaminnik pitsaanerusinnaanngitsumik saqqummiillutik. Tamakku paasisaqarfigalugit assut isumassarsiorparpoq.

Maanna alloriarnissarput pikkunartoq siunitsinniippoq, ilaatigullu Pitu-p qanoq atulersinnissaanut Nunatsinni sutigut pitsaanerpaamik qanoq atorutsigu pilersarusiornissaa tullinnguulluni. Tamatuma kingorna najukkami pisortanit namminersortunillu paasisutissanik atuisunit tapersersuilluartoqarnissaanik suliniuteqarneq tullinnguutissavarput. Eqqarsartariaaseq *sutigut iluatsitsissutigisinnaavara* qimassavarput taavalu *tamatsinnut iluatsitsissutigisinnaanerani* eqqarsarneq atulerlugu, tassami Nunarput tamaat pineqarpoq, tamatta tunniussaqaartussaavugut, taamaaliornikkut Pitu-mi periarfissat annertuut ineriartortissinnaavagut.

Sulinitinni aqutit marluk aqutigavut, teknikkimutaaqqiissutissanullu tunngasut, maannalu attaveqaammik pilersitsererpugut taannalu ataavartumik inerisarparput. Aqutip aappaa inatsisip taavalu governancep inissinnissaa sulissutigineqassaaq, taamaaligutta atuisut paasisutissanik tutsuiginartumik tunniuttarnissaat anguneqassaaq.

Piffissaq atugassarput sivilissaaq! Ukiup ataatsip ingerlanerani naammassiunnanngilagut. Kisiannili iluatsitsinikuungaaratta allat misilittagaat atorlugit sulisinnaavugut.

Pitu-mut paasisutissanik tunniussaqaqarluarsinnaanerput eqqarsaatigalugu, ileqqussat ilusilerneqassapput, pitsaasumillu kiffartuussineq nunami tamarmi innuttaasunut suliffeqarfinnullu iluaqutaasussat atulersinniarneqassallutik. Taamaalillutalu nunanit allanit niuernikkut, Nunarput soqutiginaateqarluinnartumik inissimalissaaq. Pitu-mi periarfissat angeqaat, taamaattoq qanoq annertutigisumik ineriartortitsinissarput allannguinnissarpullu atuisut apeqqutaalluinnarput.”

Paasisutissat

Pitu sunaava?

Pitu inuiaqatigiit pillugit paasisutissaannik digitalikkut ataatsimut isumannaatsumillu attaveqaataavoq, paasisutissallu nunami nunanilu tamalaani isumannaatsumik atorneqarsinnaallutik.

Pitu kalaallisut oqaasiuvoq qimussernermi allunaasatut atorneqartartoq. Allunaasaqanngippat qimmit qamutitut aaliangersimassanngillat. Aalajangersagaq ajornaatsoq

– aalajangiisorli – atorlugu qimmit pituutaat katiterneqarput aalajangerneqarlutillu, taamaalilluni qimussertup aqqutissani eqqortoq ingerlaffigisinnaavaa. Oqariartaaseq taaguullu paasissutissanik paarlaasseqatigiinnissamut Naalakkersuisunit atorneqarpoq.

Estlandimi attaveqaat X-Road-imik taasarpaat. Attaveqaatip atulernissaanut nunat assigiinngitsut Estlandimit ikiorneqareerput, matumani Savalimmiut ilanngullugit, taakkulu Heldin-imik taasarpaat.

Paasissutissat

Pitu atorlugu paasissutissat immikkuullarissut pissarsiarineqarsinnaajuarnissaat qulakkeerneqassaaq. Paasissutissat pineqartut assersuutigalugu makkuupput:

- Geodata aamma NunaGis
- Tunngaviusumik paasissutissat
- Piniarnermut aalisarnermullu paasissutissat
- Peqqissutsimut paasissutissat
- Ilisimatusarnermut paasissutissat
- Aningaaserivinnit paasissutissat
- Kisitsisit atorlugit naatsorsuinermit kisitsisit pingaarnerit

Attavissaq:

Aqutsisoqarfimmi pisortaq John Siegstad

Oq./Tel.: +299 34 69 98

E-Mail: jofs@nanoq.gl